

## Pitada luhuwala naba 1

*Maku beko lo bibo ga.*

<sup>1</sup> Nemo Pitaya Omaimidana aposolola minobo weya, Omailimo dilipe eto ibo Potu wewena ito Galaisiya wewena ito Kapadosiya wewena ito Esiya wewena ito Bitiniya ebakuka hutili ikadanaki, wau wewena liki minabo wewenasi-daya luhuwa maya je noliboe.

<sup>2</sup> Edimosidaya Omaimidana weuna oluholimo dilipe eto okadeko Jisesi Kalaestida gala eli litae loko, ito emo oladala hilelibetaibolimo dukau nokalawe okadeko minatae loko ahotipo Omaikaho lo moloneboto minabokutiya dilipe eto iye.

Omaimitokatiya nasahillila ito hulula maya edimotoka mino-loko yoweko minadeyo.

*Okulumau elewole uvaminamuya ubolo minokaka noune.*

<sup>3</sup> Lemoya We napate Jisesi Kalaestida ahola Omaimidanamuya epoka letune. Emokahoya Jisesi Kalaestida maya alo helenebokuti aku ilime sinokaiye loko lemodamu adoha nesa leko elekoko aku lemeko ohatama lepa mutiwa limiyoko, Omailokati soto pekodanaki mino-loko woko minokakamidana saina lalo letune loko ubolo oko ewa minokaka noune.

<sup>4</sup> Ito helenebokuti ilime sinaiboe loko okulumauti elewole uvamineate hulupa jeko nuwama woko heleko ametibo nesamuya ewa noudawoya,

miniki alikaya okulumau yowiki litae loko le lolowa oletaiye.

<sup>5</sup> Sa-okadanaki. Omailimo eimola abuhawowolaloti ujapa oletaidanaki, ele elewole okuniyoko, onawa woko su-noideko lilimekaka nesa libituwe loko libo nesa maya alikaya soto pideko ololo ekoloune.

<sup>6</sup> Sa-loko lonebo nesamamuya edimo elowa jiki minae. Ito Omailimo elitiboya wehe lokadeko maya onawa minawasiloya ulana molilibikaka abomuya miluma eliki miniki opaya elowa jiki minatae loko noloe.

<sup>7</sup> Eli-minahe. Goli ehadaya minoko latila okaka nesamidana pipiya nesawa netibolawayaya jolimo loko suwokadeko, goli ehadagoya wehe loko minakolaiye. Asakoya eli elewole ikaka nesatipoya yoweko neboya, ulana molilibitatabo nesalimo le momoga ekolo noideko maya, elewole oko minadeko Jisesi Kalaesti nisitibo yupeka maya ultipo le sawa nojeko depoka nolideko, onowela maya edimotoka soto pekolaiye.

<sup>8</sup> Edimoya Jisesida weunala mudamabosiya dukaya opa mikaka niae. Sa-nikiya oloti yupekaya domudaloti Jisesida maya mudamadanaki, emokumuya opa eli elewole ikaka niae. Sa-niadankaki, elowa jiki mulutipou lahelepa noiboya, lahelepa aitomidanaya wewena lepadunu lo soto moloko lametudawomidana elikaka niae.

<sup>9</sup> Eli elewole ikaka niabomidana lalowaya dukatipomidana olisauti dilimekaka nesalimoya domudalokaya nisekainako, yamuya elowa jikaka niae.

<sup>10</sup> Aya lilimekaka noibo nesaya Omaimidana epaloti ga wetome ikaka weya nenaha okoko soto pitibo ne liki hapaya ohu jikadanaki, yamidana monawamuya ijaka hiki ohu jikaka iki minabo ne. Sa-ikadanaki, edimotokaya Omaimidana nasahilila maya nisitiye liki ohuwa hukiki li molikiki minae.

<sup>11</sup> Kalaestimamo miluma elekoko alikaya lamedalaya onowelaki litibomu Kalaestida weuna oluhomo ga mako sa-loko madonipou molokaiyoko, edimosiya nena yupeka, ito nena nena okoma olisauti lilimitiye loko lo mololetaibo welo soto pitiye liki labomidana monawamu ohu jiki minae.

<sup>12</sup> Edimo yowanu leboya ediponipomuye loko minamiye. Omailimoya edimotipoloka soto pitiye loko lo soto moloko lo bibo maya ne. Sa-okaiyoko, alikaya ya nesamidana ihilawa soto piyoko Omaimidana weuna oluho oli hiyoko okulumauti lemekoko abuha-wowo bekaiyoko ga lalo li hutili abo wesiya aya nesamu li libikayoko, edimoya alo eli-minabo maya ne. Maya ga masumawayaya okananipoki wesiya ele wehe letune likiki koli mikiya minae.

*Eto oko minoko leko etudawo ga.*

<sup>13</sup> Sa-onebo nenako, edimosiya duka datamidanaya nala jiki etoha ikiki minadeko, ujapa etoha iki Jisesi Kalaestikaho nasahili lalo leko niseko libitibomuya ubolo iki minalo.

<sup>14</sup> Omaimidana eli mikaka niabo wewenalityaya gala elamiki aita minadanaki dupamo umu helibo

nesa likaka iki minabo maya neyo. Olotiya sa-iki minamilo.

<sup>15</sup> Lesa molo libibo we Omaiya eto oko nebomidana ikigo eto iki minalo.

<sup>16</sup> Omailimo libo aya monoka bukugu sa-liki luhuwa ji-minabo ne:

Nemoya eto oko minobomidana oko edimokiya eto ikigo minalo.

<sup>17</sup> Ito edimosiya ahote likadanaki Omailoka likaka niae. Emokahoya woko leko niseko leko amoko moletoko minoko lemo oko moloko etudawo monawatemidana maya makoko aweyaha oko ona mololetakolaiye. Sa-oneyo, edimoya maya mikauka wau minatabo onawaloya oli miki minalo.

<sup>18</sup> Sa-ikiki edimosiya sa-liki wati iki eli-minalo: Edimoya ahotipolesi wiki halakikaka niabo anulo maya niwayoko dilimiboya saina hutuwa goli siluwa aha nesakidanlotiya meinawa heko olisautiya dilimamibo maya ne.

<sup>19</sup> Kalaestida oladalalimoya meinawa yoweko nebolimoya edimosidaya olisauti dilimenebo maya ne. Emoya sipisipi ja akalewa upalo misikosela minamibo okuluma ijopakidana ne.

<sup>20</sup> Ito hapaya mikamidana ahoda owaha soto pamibo onawaloya Omailimo yowanu ga loetokaiyoko soto pibo welimoya alikaya onawa suwekolo noiyoko edimokumuye loko soto pibo ne.

<sup>21</sup> Sa-okadanaki, Omailokaya le kololibetaiye. Sa-okaiyoko, helenebokuti aku ilime sinokadanaki onowelaki lamedala le olo jetaibo wemu eli elewole ikadanaki eli elewole ikaka

niabo nesaki ubolo eliki minikaka niabo nesakiya Omailokagoya ne.

<sup>22</sup> Emo gala lalo eli likaka niayoko, duka nokalawe olibetaibokumuye loko wewenati polesida suwa ga lamiki duka bikaka niae. Sa-iki duka laloki minabokuti emo uka mideko emo uka mideko iki minalo.

<sup>23</sup> Edimoya ohatamamidanaya soto pikae. Ahotipoleya helikaka abo yuhauti minahekela, elewole we Omailokati soto pebo maya ne. Omaimidana galalimoya elewole weute le soto peko elewole oko minokaka gautiya soto pebo maya ne.

<sup>24</sup> Yamidana ga makoya monoka bukugu sa-loko ne:

Muki wewenaya ohunahumidana iki minae, ito mudai lalo ikaka niabo nesanipoya saina uvawamidana iki minae.

Ohuwa maya alala miki opatikaka niae. Ito uvawalimoya lutiyemo jekaka noiboya,

<sup>25</sup> We napamidana galalimoya elewole oko minoloko woko elewole oko minokaka noiye.

Sa-okaka noibo ga lalo maya alo li libikayoko eliminabo maya ne.

**16** Liv 11:44-45; Liv 19:2 **24-25** Aes 40:6-8

## 2

*We napaya elewole oko minokaka ehadamidana minokaiyoko emola wewenala yuha minune.*

<sup>1</sup> Edimoya alo ohatama minabo nenako, hokoliya ito suwa nesa depa uluma lowe ito dukau yowi hilikaka nesa ito liki letiki likaka nesa maya hulikalo.

<sup>2</sup> Oluho aida amida ninabosiya amidanipomugo elikaka niabo nesa liki amida lalomugoya deladeko minalo. Sakiya amida lalogoya ni-liki wiki monokauya napa liki minatae.

<sup>3</sup> Sa-itaboya, We napamidana nasahilila lahelepa ibolawa alo li-minabo wewenasiya sa-itae.

<sup>4</sup> Edimoya We napaya minowa minowa ehadakidana weya wewenasiya muda-eli hulabokumuya Omailimo eliyoko meinawa yoweko nebo we ilime eto ibo welokaya nisiki kolalo.

<sup>5</sup> Sa-ikiki edimo weutipokiya ehada lolo i suwikiki magoina koliki mini-liki yowiki Omaimidanaya weuna oluhomidana monoka numudala lolo iki minatae. Sa-ikiki Omaimidanaya jokila hi mikaka wewena eto iki miniki Omaimidanaya epoka liki uda ji mikaka ideko Jisesi Kalaestitoka wideko ele wati etiye.

<sup>6</sup> Jisesikumuya ga mako monoka bukugu saloko nebo maya ne:

Nemokahoya elewole ehada mako meinawa yoweko nebomidanaya ilime eto okodanaki Jelusalemu wewenanelesida luwawanipouya ehada ahodanipouya le nohoe. Sa-ominonako, emokumu eli elewole itabo wewenasiya wiki aya lalo nesa maya lamiki ahamu ewa iki minamikilae.

<sup>7</sup> Edimo emokumu eli elewole ikaka niabo wewenositokaya eimolakahoya meinawa yoweko nebo nesakidanaya ne. Ito eli elewole amabo wewenasidamuya monokauya sa-loko lonebo maya ne: Numuda vikaka wesiya ehada mako mudai hulabolimoya elewole ahoda lolo okadanaki ne.

**8** Ito emokumuya monoka bukuguya luhuwa mako sa-loko ne:

Aya ehadamidana mupilaloya seluwa wileko ne.

Sa-onenako, aya ehadalotiya kohaidoko molakolaiye.

Sa-loko wewenasi monoka hulatabotoya seluwa wilitiye loko lonebo maya ne liki wiki sa-ikaka niae.

**9** Sa-oneboya, edimo dilipe eto onebo wewenaya ito We napamidana jokila hi mikaka niabo wewenaya ito Omaimidan eto i-minabo wewenala wehe liki lolo iki minae. Edimodaya lubu jenebokuti dilipe eto okadanaki, lamedala lalolo dilipe molaibo wemidana galaya li hutili ideko hutili etiye loko dilipe eto ibo ne.

**10** Omutiki maya edimo aha nesa lolo iki minaboya, olotiya Omaimidan wewenala yuha lolo iki minae. Sakiya omutiki aito minabo maya neboya, olotiya ukala libibomidana ulauya yowiki minae.

**3** Sam 34:8 **6** Aes 28:16 **7** Sam 118:22 **8** Aes 8:14-15

**9** Eks 19:5-6; Aes 43:20-21; Tae 2:14; Aes 9:2 **10** Hos 2:23

### *Omaimidana elekele wewenala minatune.*

**11** Wewenanele yuhase, nemoya ga mako lo libituyo, elilo. Edimoya maya mikauka wau wikaka niaboya, dupalimoya aha wenoka wewenakidana dupa delokaka noibo nesalimo dukamidana lowa hi mikaka niabo nesaya hulikalo.

**12** Sa-ikiki hetoka wewenasikutiya aito aweyaha iki minalo. Sa-ideko hetoka wewenasiya edimo monawatipo mudaikiki lahelamibo nesa lolo

ikaka niabo wewena minae liki likaka niabo ganipoya hulikiki edimo iki moliki itabo monawa laloya mudaikiki Omailimo yowanu ga lobetatibo onawaloya Omaimidan epoka liki minatae.

<sup>13</sup> Wewenasi aito-aitomidana ujapa we dilipi molabo wewenasidaya edimosiya We napamidanamuye liki elekele ibitalo. Gamani wewenasida uliki we napamidana gala,

<sup>14</sup> ito kiyapemasi li hukabo gakiya eli lita. Omailimo lahelamibo nesa lolo ikaka niabo wewenasidaya oijo bitiye loko ito ganipo eliki saina lalo lolo iki minikaka niabo wewenasidaya ulinipo li sawa jitae loko gamanitelesidaya dilipe soto onebo maya ne.

<sup>15</sup> Edimoya sakiya wati iki, iki moliki itabolimoya nei wewenasiya edimokumu nei ga likaka niabo depaloya wasa jitae loko Omailimo lolibetone.

<sup>16</sup> Edimoya muki nesamidana nalalauti maya alo olutoletokaibo maya ne liki wati iki miniki liki ilo. Ito sa-iki minataboya, lahelamibo nesamidana anula mayaaku li golotamilo. Sakiya elewole iki Omaimidan elekele oluholala lolo iki minalo.

<sup>17</sup> Sa-iki edimolitaya muki wewenasida maya dilipi lalo ilo. Ito maloka wewenatipole monokau minabolawasidama duka bilo. Sa-iki Omaimidanamuya oli libideko minalo. Sa-iki uliki we napatipo ilimi napa ilo.

*Kalaestikaho milumate elidanaki lilime alika moloko omutiye.*

<sup>18</sup> Edimo elekele oluholitaya ujapa wetipolesida diuka limiki miniki nasahili ibitiki ganipoya elilo.

Ito wewena lalo duka laloki minabo wewenamugo nehekala, mukaha wewena elewole ga li libikaka niabo wewenasidakiya sa-ibitalo.

**19** Edimoya ga minametiboto aha miluma yowanu libitikadeko maya, edimosiya Omaidamu data ki miki lukaha amiki minadeko, Omaimidana ukaukaya dowa letiye.

**20** Ito edimoya lihima nesa lolo ikadeko oijo nilibidekoma luhaka amitaboya wewena makolimo depoka lolibetatibo nehe. Sametibo ne. Sa-etibo neyo, yamuya wati iki minadeko kohaidiki miluma nesa lolo ilibitadeko maya, domoda wamideko minalo. Sa-itaboya Omaimidana ukauka wati ekolaiye.

**21** Edimosiya sa-itae loko Omailimo ju lo libenebo maya ne. Yamidana monawaya sakoya ne: Kalaestikaho asako edimokumuye loko miluma elidanaki le omutoko anu wileletonebo maya nenako, yauya edimosiya iyakau maya jiki wilo.

**22** Emokahoya lihima nesa mako lolo oko epalautiya suwa ga mako loko amibo maya ne.

**23** Ito liwi letiwi iki litabotoya asako lewo letowo oko lobetamibo ne. Ito miluma eliboya auha bamidanaki monawalamuya wehe loko lo hukokaka wehe liki minikakamidanamu miniki liki itae loko sa-ibo maya ne.

**24** Lemo lihimatelimoya emo mupilalalo yoweko minokaiyoko, eda elekaiyoko yoho yaha yalo heliboya, lihimanipo nebo wewena helebomidana momoga iki sinami ikakamidan minoko wehe liki minikakamidanamu miniki liki itae loko sa-ibo maya ne. Ito emo hulalalimoya

edimo dupaloka ito dukatipomidana hulala elibo maya ne.

<sup>25</sup> Edimoya sipisipi jakidana liwe hiki monebo neboya, olotiya dukamidana ujapa welimoya aku dilipe wili jekaiyoko, emotokaya nisiki olotiya minae.

**22** Aes 53:9 **23** Aes 53:7 **24** Aes 53:4-5 **25** Aes 53:6

### 3

*Weki menaki minasaibo ga.*

<sup>1</sup> Ito edimo menalitaya ayamidana iki wautipolesida diuka limiki minalo. Ito wautipole malokaya monoka elamiki minataboya monoka elitae liki monoka ga li bamiki aha duka laloki minikadeko,

<sup>2</sup> wautipolesiya edimo iki moliki iki minatabo nesalimoya wati okadeko mudaikiki dukanipo li wili jiki minatae.

<sup>3</sup> Ito edimo dupatipolokaya onowe nesamu ito yopatipo li lalo-talo ikaka nesamuya ito onowe lalo kolikaka nesamu ito di dadeloka saina meinawa yoweko nebo nesa li kolikaka nesamuya data kiki amilo.

<sup>4</sup> Sa-noideko, dukauya moletiki hulu iki minatabo nesalimoya dukauka wati okogo nedeko, onowelaki elewole oko minokakamidana ito ase-hawa lamokakamidana ito Omailimoya napanapa nesa ne-loko elitibomidanaya mudatae.

<sup>5</sup> Monokanipoki menakipa hapa mini-liki nisebo menasiya asaikiya dukamidana onowela likadanaki minae. Sadanaki, Omailoka eli miki waunipolesida diuka limiki minabo maya ne.

**6** Selakahoya asako wauna Aebalahamuda gala ele lekadanaki, waunakumuya we napane loko lo mekaka iye. Ito edimo saina lalo lolo iki muki nesahenamu domoda wamideko minataboya, Selada oluhola yuha minae loko lolibetatune.

**7** Edimo waunipolitaya asaiki menatipolesitoka koliki miniki elewoleyani poya lemeko nenako, saina-mainaya duka lalolotigo li bi-minatae. Edimoya magoinaya menatipoleki elewole depa mutiwama li-minabo maya ne. Ito Omailoka likaka niabo ganipoya woko aha nesa lolo ametiye liki menakipatipolesida dilipi wati iki minalo.

**1** Ipi 5:22; Kol 3:18 **3** 1 Tim 2:9 **6** Jen 18:12 **7** Ipi 5:25; Kol 3:19

*Oko moloko etudawolimo wehe nolideko milumaya ele aha nesa etudawo nesa.*

**8** Sa-nikiya le nupa oko lo libituyo. Sakikiya mukiya dukatipo moli makokoto ikiki wati iki miniki duka emo mideko emo mideko iki wewenatipolesidamu eliki dupatipo liki limiki minalo.

**9** Lahelamibo nesa lolo nilibitadeko maya, dade lihima liki aya wewenasida lolo ibitamilo. Edimosidama liwi letiwi ga nilibitadeko maya, asaiki libitamiki makuya bilo. Edimosida maku libekoyoko, elewole nesa litae loko Omailimo lesa mololibetonebo maya nenako, edimosiya asaikiya maku aya libitalo.

**10** Yamuya monoka bukuguya ga mako sa-loko ne:

We napalimoya wehe liki minikaka niabo wewenatokago mudaidoko emotoka likaka niabomuya ata moloko ameme noiboya, lahelamibo nesa lolo ikaka niabo wewenasi-

damuya We napalimo mudaiboya, wehe  
laminako,

<sup>11-12</sup> elewole oko minokaka nesamuya dukauka  
wati ideko elowa jeko minatune liki maya de-  
palo ujapa i-miniki lahelamibo gahena lamiki mi-  
natae. Ito depadunu suwa ga mako lamitae. Ito la-  
helamibo nesamidana demesa mikiki saina laloya  
lolo itae. Dukaya hulu iki miniki ya yowanumi-  
dana ihilaya letune liki iki moliki iki minatae.

<sup>13</sup> Edimosiya sainala lalomuya wiki koliki mi-  
nadeko, wewena mako ekahimamo lahelamibo  
nesa lolo olibetatiye.

<sup>14</sup> Edimosi iki moliki itabo nesalimoya woko  
wehe nolideko miluma nesamidana epalo mi-  
natabolimo elowa jitabo nesatipo lolo etiye. Ito  
lowa hi nilibikihe ito domoda wetibo ga nilikima,  
di dade unuwaya pipi amideyo. Ito mulutipo  
molamilo.

<sup>15</sup> Ito dukatipo li uluwitiki li lolowa ikadeko,  
Kalaestikaho We napatipo wehe loko lolo ideyo.  
Sa-ikadeko saina-mainamuya dukadunu ewa  
iki ubolo minikaka niabomuya loka nilibitadeko  
maya, li lolowa iki monawa lo soto moloko betune  
liki li wati ikigo minalo.

<sup>16</sup> Sa-nikiya gaya moletiki edimokumu  
elitaboya aha nesa lolo amideko dukauya  
lahelamibo ga minamideko wati iki li bitae. Sa-  
itabomuya edimokumu liwi letiwi nidekoma,  
Kalaestiki koliki wati iki minatabo nesalimoya  
yatoka suwalo wewenasida ganipomidana  
monawayaya soto pekadeko dupalo elikilae.

<sup>17</sup> Sa-etibo neyo, yamuya sa-liki eli-minalo:  
Edimoya saina lalo lolo iki minadeko, Omail-

imo mudatiboya, wehe lokadeko, kohaidiki nala hililitataboya dowa loko ne. Ito edimotipo li-hima likadeko lolo ilibitatabolimoya, woko dowalamekiye.

<sup>18</sup> Eli-minahe, Kalaestiya asako we lalomamo lemo lahelamudawo wewenamuya heliye. Lemodamuya lihimate suwetiye loko lemokumu wehe loko yu makoko helibo maya ne. Omailoka dilipe molakolo ibo upaki minokaiye likiki kohaikayoko, heliye. Sa-ikayoko, weuna oluhoki minokadanaki nenako, aleuti maya momoga oko sinaiye.

<sup>19</sup> Ito weuna oluhoki minikiki heliki wabolawayaya nala ohou minabo wewenasito lemeko monoka lo biye.

<sup>20</sup> Edimoya hapa yeikalaya Nowakaho noku lape lolo oko neyoko Omailimoya mulunau hulu ibo we nebokumuye loko aku duka li wili jitahe loko dewa o-loko noyowiyoko, gala maya eli hula hula imi yowe. Sa-niayoko, wewena 8-palasigoya aya noku lape napau maya yowikayoko, Omailimoya dilipiyoko nokuya sima namiki aha minae.

<sup>21</sup> Asakoya yamidana aweyahaloya noku udolibetokaka nesalimoya dilipe lalo okaka noiye. Monoka noku udukaka nesalimoya ma duka le uluwitamiye. Monoka nokuya noududanaki, Omailimoya lukate nokalawe oletatiye loko elekaka noune. Monoka nokuya nouduniyoko, Jisesi Kalaesti helenebokuti aku ilime sinaibokumuye loko olisautiya lilimekaka noiye.

<sup>22</sup> Ito eimolaya okulumauka Omaimidana adela lamawakaloka yoweko ne. Yalokaya yoweko

neyoko, okananipoki we yowiki minabolawa ito dabuha-wowonipoki minabolawakiya emoda ilauka limiki minae.

**10-12** Sam 34:12-16 **14** Mat 5:10 **14-15** Aes 8:12-13 **20** Jen 6:1-7:24

## 4

*Omaimidana epalau awa heko gala eleko minatudawo.*

<sup>1</sup> Edimolitaya Kalaestikaho upa miluma elibomidana eletune liki dabuha molalo. Sa-nikiya sa liki elilo: Wewena makolimo upa miluma elekaka noetibolimoya lahelametibo nesa lolo-halo okaka noetibo nesa maya atala molakolaiye loko ele tunc.

<sup>2</sup> Ito dupalimo netibo onawaloya umula helitibo nesalaya lamiki Omaimidana galaloya epalauka awa hiki minalo.

<sup>3</sup> Omutoko yeimalokaya hetoka wewenasi saina-mainamu dumu helekaiyoko lolo-halo iki minaboya oselenipo delamiye. Lahelamibo nesa anulo pasidiya nesa lolo iki ekesa nolo miniki ito ja-ula nesa liki sipaki no wavu-liki nadanaki weunipo molaboya emo asetaiyoko emo asetaiyoko iki luweha nesaloya monoka likaka iki minae. Sakiya aya nesalo wiwa wiwa iki minayoko, onawa hana-pana wibo neyo, akuya aya nesalo emesalo moloko lolo etune liki lamilo.

<sup>4</sup> Ito olotiya monoka elamabo wewenasiya lahelamibo nesamidana ulauya minayoko, edimosiya nodenesa napa-napa ataina iki meleke nama iki olisa-alisa ikaka niaboto demesalo molamayoko elikadanaki, ololo ikiki ulana molilibitiki liwi letiwi ikaka niae.

<sup>5</sup> Sa-ikaboya, lemo aha minudawolawa ito helebolawakiya monawatemuya obi oletatuwe loko le lolowa onebo we Omailokaya ga yowanu napanapa likilae.

<sup>6</sup> Yamuye loko helebo wewenasiya emo gala laloya lo soto molo bibo wewenasiya helebo wewenasiya anulo wadanaki dupanipolotli ihmima likayoko, Omailimoya monahanawanipomuya obi obetaiye. Ito apila malokaya Omaimidana emesalo moliki wikiki elewole iki minikaka nesa mako litae loko gala laloma lo bibo maya ne.

*Omaimidana nasahilila maya moletoko leminko ona molatune.*

<sup>7</sup> Saina maina mukiya suwetibo onawayaya alo alili okaiye. Sa-okaiyo, edimoya duka depa ujapa iki eli wehe liki Omailoka lokakakumuya li lolowa iki minalo.

<sup>8</sup> Sa-nikiya lukate bekaka etudawo nesalimo lihimate mukiya emo le huloetadeko asako emo muki le huloetadeko oko minatudawo nesa nenako, muki nesa aseko nebo nesaya emo ukala mideko emo ukala mideko iki dabuha molalo.

<sup>9</sup> Edimoya osele delamideko wenoka wewenakidana iki emo nasahili oetadeko emo nasahili oetadeko iki dilipi numudatipouka moliki dilipi lalo ilo.

<sup>10</sup> Edimoya Omai monokala abuha-wowola aito-aitomidana libibodunuya yowanu likiki muki wewenositoka woko litiye liki Omaimidana nasahilila maya moletiki you liki ona molikaka wewenaya lolo iki minalo.

<sup>11</sup> Ito monoka litabo wewenasiya Omaimidana gala lalo maya wetome iki li bilo. Ito maloka

wewenasida nasahili ibitatabo wewenasiya Omailimo abuha-wowola libekadeko satae. Edimoya yamidana mavidana nikiya Omaimidan luwuwalaya wehe loko netiye liki nasahili ibitalo. Jisesi Kalaestikumuye loko Omaimidan luwuwalaya napa etiyo. Yamuya onowelaki lameda elewoleyalakiya emotoka netiboya minowa minowa oko netiye.

**8 Plo 10:12**

*Kalaestida wewenala minudawomuye liki ulana molilitatae.*

**12** Nukane libobo wewenase, edimotoka mimi molokaka nesa epaki nesa soto pitiboya edimosiya lemotoka ohatama nesa soto pekaiye likiki domoda wamideyo.

**13** Edimokumu Kalaestikaho miluma elibomida ulauya miniki dukau wati ideko minalo. Sakiya miniki emo onowelaki lamedalaya edimotoka nisekadeko asaikiya mulutipouya aila uluma nosilideko elowa jiki minalo.

**14** Edimoya Kalaestida uliwa li-minabokumuye liki, liki letiki mumusopa nijilibitadeko maya saliki elilo: Saki lahelametibo nesa lolo ilibitikadeko maya, ahola Omaimidan weuna oluhola maya lemotoka lemeko netibomidana monawa soto pekaiye liki elikadeko elowa jitabo nesatipo lolo etiye.

**15** Edimokutiya wewena makolimo obi oetokadeko miluma elitiboya, koha helekakamuhe, ito ukelemuhe, ito ohetamuhe, ito aito wewenasi nesamu le ladaya okaka nesamuhe, yatoka nesahenamuya lolo amideyo.

**16** Ito malokaya edimosiya Kalaestida wewenala minabomuye liki dilipi nalato molikadeko maya, dupalo elamideyo. Dupalo elamiki Kalaestida uliwa maya li-miniki Omaitoka eke litae.

**17** Eli-minahe, Omailimo wewenasida monahanawanipomu ona molobetatibo onawaya alo alili okaiye. Sa-okainako, wewenanele yuhase, aya yowanuya lemotokaya api oko niseko lekolaiye. Sa-etibo nenako, adaya lemotoka napa oko niseko litiboya, le-loko woko Omaimidana gala lalo eli hulikaka niabo wewenositokaya le suwoko edawaki nesa leko obi obetatibo ne.

**18** Yamuya monoka bukuguya ga mako sa-loko ne:

Wehe liki minabo wewenasiya lihimanipomu obi itabo onawaloya you nesa minaminako, olisauti dilimekadeko minatabo nenako, yamuya monoka eli hulikaka niabo ito lahelamibo nesa lolo ikaka niabo wewenaya nenaha itabo ne.

**19** Ito yamuya Omailimo elideko wehe lokadeya maya miluma nesamidana epalo minabo wewenasida maya dilipe wati okaka we Omaikaho lokaiyoko elewole okaka noibo wemidana adeuya dukatipo molikiki wati iki minakilae.

## 5

*Omaimidana sipisipi jala lainiloya ujapa obetatune.*

**1** Edimotoka monoka we loidawa minabokidana oko nemo monoka we loidawa minobo welikaya ga lo libekoyoko elitae. Kalaestikaho

miluma-aluma elibolawaya wehe loko nomudaloti mudaminobo maya ne. Sa-ominobo nenako, minoko alikaya onowela maya lamedalaki soto pe-loko woko soto nopideko maya, ija jeko lituwe loko lobo we nemoya gala maya data leko lo noliboyo, elilo.

<sup>2</sup> Omaimidana sipisipi jalasida maya edimo ujapa ibitatae loko lolibetoneboya elewoleuti nehekala, mulutipou wati onedeko ujapa lalo ibitatae. Sa-nikiya moni uvaminamu likaka aya elikiki nehekala, aya yowanumuya mulutipou le lolowa onedeko iki moliki itae.

<sup>3</sup> Sakiya we napanipo lolo ikiki samilo. Sipisipi jatipolesida li omutibitiki monoka diyakau jiki witae liki dilipi-liki witae.

<sup>4</sup> Ito ujapa we napalimo niseko onowelaki adakoli elewole oko minokaka adakoliya olo jelibikadeko olo jikiki minatae.

<sup>5</sup> Ito asaiki ohatama wewenalitaya olopa wewenasida diuka limiki minatae loko lo noliboe. Sa-nikiya diuka limiki minatabo nesalimo muki wewenasi yowanu likili olo jikaka niabo nesatipo lolo okadeko, olo jikiki miniki emo elekele oetadeko emo elekele oetadeko iki minalo. Eliminahe, yamuya monoka bukugu ga mako saloko ne:

Omailimoya edimonipo dupa liki yowikaka niabo wewenasida luhawanipoya leko asutokaka noiye. Ito dupa liki limiki minabo wewenasideya dilipe wati idanaki nasahili obetokaka noiye.

<sup>6</sup> Yamuya Omaimidana elewole ujapalaloya dupa liki limiki Omai adelamidana iwaukaya you liki

minalo. Sa-ikadeko, eimola molaibo onawa maya alili okadeko ultiipoya le sawa jitiye.

**7** Omailimoya ujapa lalo obetoko dilipe lalo okaka noinako, yamuya edimo muki nesamu data etipa kikaka niabo nesahenaya eimola adelaugoya mo-lalo.

**8** Edimolitaya data ki wehe liki ujapa iki minalo. Ula wetipo ololahlimoya okohimi ulakidana oko epalaya ka okaka noibo welimoya ya kohituhe ma kohituhe loko sa-oloko woko niseko okaka noiye.

**9** Sa-okaka noiyo, edimoya eli elewole ikakatipokiya elewole iki miniki demesa milo. Sa-iki miniki sa-liki elilo: Muki ebatoka wewenatipole monokau minabolawakiya asaikiya miluma-aluma elikaka niae.

**10** Nasahili ahola Omaiya onowelaki lamedala elewole oko minokakamidanalogaya Kalaestiku-muye liki wiki hetatae loko lesa molo libibo welimoya onawa lasolasi miluma nielideko, dilipe wehe letibo abuha-wowoya libekoko dilipe ilitoko luhawatipo maya le ilitekolaiye.

**11** Yamidana elewolewaya emotokago molai-boyta minowa minowa oko minadeyo. Yotokoe.

**2** Jon 21:15-17 **5** Plo 3:34 **6** Mat 23:12; Luk 14:11; Luk 18:14

### *Wewena mako dupamu elaiyoko loko suwiye.*

**12** Nemokaho ga maya Saelasida lo meme noyoko luhuwa je nolibiy. Nemokahoya emokumu elekoyoko wewenane lalo lolo one. Nemoya Omaimidanana nasahililamu eloyoko, lahelepa onebomidanamu ga minawa lo soto moloko lo bodanaki duka le elewole etuwe loko lo

noliboe. Sa-ominoyo, aya nasahilimidana ulauya siniki elewole iki minalo.

<sup>13</sup> Babilonikidana nebo numutokati Omaimidana wewenala yuha lemoki dilipe eto onebo wewenasiya dupamu delaiyoko noloe. Ito monokau ilime molobo we Makikiya asako dupamu elokaiye.

<sup>14</sup> Edimoya monokauya koli lalo iki dapusa jiki minalo.

Kalaestitoka koliki minabo wewenalitaya, Omaimidana hulula laloya edimotokaya adoha nesa leko minadeyo.

**12** Apo 15:22,40 **13** Apo 12:12; Apo 13:13

**Yaweyuha New Testament  
The New Testament in the Yaweyuha Language of  
Papua New Guinea  
Nupela Testamen long tokples Yaweyuha long Niugini**

copyright © 1983, 2011 Biblica

Language: Yaweyuha

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

---

PDF generated using Haiola and XeLaTeX on 28 Dec 2024 from source files  
dated 31 Aug 2023

ed86303f-aed2-5107-93c7-75e88d05f222